

7  
LE  
BOVCLIER  
ET L'ESPE'E  
DV  
PARLEMENT  
ET DES  
GENERAUX,  
CONTRE LES  
CALOMNIATEVRS.  
*Par M. L.*



A PARIS,

---

*M. DC. XLIX.*









*LE BOUCLIER ET L'ESPEE DV  
Parlement & des Generaux, contre  
les Calomniateurs.*

**C**'EST vne chose estrange, que parmy le mal'heur public il se trouue encore des ennemis si conjurez contre la tranquillité des hommes, que leur plus grande joye soit la douleur des particuliers: Des monstres qui voyans soupirer la France voudroient voir mourir les Parlement, & les Generaux qui l'ont secondé, & qui ne peuuent se lasser d'accuser ceux qui ont trauaillé pour nostre bien, d'estre les causes des nostre ruine.

A n'en pas mentir, cette manie est extreme: Et ie n'ay point encore vû de malade qui maudit sa teste des douleurs de ses membres, quand cette teste en cherchant la guerison ny peut pas trouuer de remede. Car enfin il est du deuoir du chef de mediter les moyens de guerir le reste du corps; & dans l'occasio passée, le Parlement n'a fait que ce qu'il estoit obligé de faire, quand il a cherché le salut de la France.

*La teste doit  
prendre soin  
des autres  
membres.*



Chacū cher-  
che naturel-  
lement son  
salut.

Vne humeur  
estrangere  
rend l'Estat  
malade, & il  
ne se trouue  
point de  
Medecin.

Il a donc fal-  
lu qu'il fit  
luy-mesme  
vn effort  
pour sa gue-  
rison.

Que s'il le faut prendre d'une autre façon, ie di-  
ray que quand la douleur nous presse la crainte de  
mourir nous esueille, nous cherchons le Medecin  
de toutes parts; Et si nous n'en pouuons pas trou-  
uer au mal qui nous tuë, la nature nous force de  
faire de nous-mesmes tout ce que nous pouuons  
pour nostre salut. En ces derniers temps il est arriué  
à cét Estat vne maladie bien violente, & bien dan-  
gereuse. Vne humeur maligne & *Estrangere* s'est  
glissée dans les naturelles: desia elle en a corrompu  
vne grande partie: desia elle prend l'Empire sur les  
autres; & les parties nobles sont desia mesme alte-  
rées de sa contagion. Tous les membres de cét Em-  
pire soupirent sous l'oppression de la douleur.  
L'un apres l'autre ils tombent dans la defaillance;  
Et enfin ce grand corps va bien tost mourir. Ce qui  
est de plus deplorable en la maladie, & de plus à  
plaindre au malade; C'est que les Medecins ou ne  
connoissent pas le mal, ou du moins ne veulent pas  
le guerir. Il y a long-temps qu'ils sont sollicitez  
par l'affligé: Long-temps qu'ils entendent les cla-  
meurs du pauvre peuple oppressé, qui demande  
avec des pleurs sanglants quelque remede à son  
mal extreme: Et long-temps qu'ils ont vû cét  
Estat à la mercy de son infortune, sans auoir eu pi-  
tié de sa peine. Mais comme la necessité fait bien  
souuent des miracles, cét Estat abandonné de ses  
vrais Medecins, luy mesme a fait vn effort contre  
sa ma-



sa maladie, & luy mesme a trauaillé à la santé qu'il auoit perduë.

Ie dy luy mesme. Car puis que c'est le Parlement qui a fait le genereux dessein d'une si grande & si necessaire cure, ie dy vray quand i'asseure que c'est l'Estat luy mesme qui l'a fait. Cét illustre Parlement; Ce Senat de demy-Dieux familiers & visibles representant le Monarque & les sujets de ce Royaume, en est vne parfaite & vne naïfue representation. Ayant l'autorité de l'un dans les mains, & pratiquant l'obeïssance des autres, on ne peut pas douter qu'il ne soit l'Estat tout entier en racourcy puis qu'il n'vse pas moins de l'autorité du Prince, *en faisant iustice*, que de l'obeïssance des sujets.

Le Parlement represente parfaitement l'Estat, & mesme est cet Estat en racourcy.

Après cela doit-on trouuer estrange les projets de sa generosité? Est-il quelque loy que nous connoissions (ie dy mesme chez les peuples les plus barbares) qui ne permette pas la resistance que tous les estres font à leur destruction & à leur perte? Vn ver que nous foullons aux pieds fait bien ce qu'il peut pour s'en garantir: Et defait, c'est vn droit aussi ancien que le monde, que la nature apprend à toutes choses, & que la iustice humaine & diuine ne punist en qui que ce soit.

La conseruation de soy-mesme est de droit naturel.

Quand mesme ce grand Corps ne seroit pas en racourcy tout l'Estat, puis qu'au moins il en est vne partie, N'estoit-ce pas son deuoir de conseruer l'autre? L'ordre que Dieu a mis dans le monde pour

La Iustice est la principal partie del'Estat.



le salut de toutes choses , ordonne que les mains pensent les playes des autres membres du corps affligé. La Iustice est la main de l'Estat : Elle doit donc auoir soin des autres parties. Puis qu'elle est establie du Souuerain pour proteger les innocens , & pour chastier les coupables , on ne doit point trouuer estrange qu'elle ait entrepris son deuoir.

Ie sçay bien que ceux qui veulent flestrir la gloire du Parlement , disent qu'il entreprit ce deuoir par force ; que sa generosité estoit vne action de contrainte ; que la peur l'auoit rendu comme courageux. Ces discours toutesfois ne peuuent partir que de ceux que ny peur, ny honte ne sçauroient iamais empescher d'estre lasches ; Et la noirceur de ces indignes pensées ne peut estre produite que dans ces esprits tenebreux, qui detestent mesme la lumiere du iour. Ceux qui disent que le dépit auoit animé ces Senateurs , & que le refus de certaines choses , ie ne sçay comment imaginées, les auoit mis en colere, ne sont pas plus sages ny moins criminels. Que pouuoient auoir demandé de mauuais ceux qui ont bien eu le courage de demander la liberté de la France ; Et que leur eust pû refuser celuy qui n'ayant pû les corrompre par ses presens, à bien eu la malice des'en vouloir défaire par le trespas. Si quelque dépit les a animez c'est celly-là de voir la tyrannie d'un mauuais Ministre ; & s'ils ont senty quelque colere , c'est celle-la dont ses violences



doiuent encore embraser tous les cœurs genereux. Qu'on ne die donc plus qu'ils ont fait leur deuoir par force. S'ils y ont esté forcez, c'est par les excez de nostre Tyran; Et si quelque peur les à pû saisir, c'est celle-la d'estre responfables au Thiône de Dieu d'une indulgence si fatale à tout ce Royaume.

Et de fait s'ils eussent voulu se relascher en faueur du Cardinal, l'ennemy conjuré de leur Patrie, que n'auroit-il point fait pour eux. Faut-il douter que tout auare qu'il est, il ne leur eust donné au delà mesme de leurs demandes, par le propre interest de son auarice. Mais il n'auoit pas rencontré dans ces tuteurs de nos Roys des Iudas qui vendent leur Maistre. Il ne trouuera pas dans ces sages Illustres, ce que jadis on vit trop ordinairement dans le Senat Romain: Cette bassesse de courage qui luy faisoit si souuent applaudir à l'infamie des fauoris de ces Souuerains: Ces loüanges seruiles que contre les sentimens de leurs ames proferoient les bouches de ces indignes Senateurs; Et cette complaisance ridicule fille honteuse & criminelle d'un excez de timidité & de crainte.

Le Parlement n'a pû estre le flatteur du Cardinal.

Sa grandeur redoutable au lieu de les auoir intimidez, les a enhardis; Et comme c'est le propre des grands courages de se roidir aux plus grands perils, plus ils ont vû de danger à acquerir leur gloire, & moins ils ont consulté s'il la falloir acquerir, sçachant bien qu'elle est tousiours plus éclatante aux

Sa grandeur les a enhardis plustost qu'intimidez.



rencontres où elle est plus difficile; Ils se sont généreusement comme de vrais Iasons exposez à la mercy de la mer & des vents. Ils ont leué l'ancre, & desployé les voiles sans peur du foudre & de la tempeste apparente qui se monstroit dedans la nuée. Ils ont combattu ces fiers Taureaux, qui dans le Champ de Mars ne jettoient que feux & que flâmes; & s'ils n'ont pas vaincu ce fier Dragon, gardien de la plus riche toison de ce Royaume, il en faut recognoistre vne autre cause que leur manque de generosité. Tout cela n'estoit pas, quoy qu'on en puisse dire, vne entreprise peu difficile: Il falloit pour vn dessein si juste & si hazardeux de grands cœurs & de bonnes ames. Dans la gloire qu'ils possédoient, & qu'ils possèdent encore; assis au Thrône de la Justice, Dispensateurs du pouuoir Souuerain, Astres Tout-puissans dont les bonnes ou les mauuaises influences dominant toutes les parties inferieures de cet Estat; vne infinité de personnes se seroient peu souciez de la miserable condition du reste de la France. Rarement voyons-nous ceux qui sont à leur aise penser à soulager ceux qui n'y sont pas. Du faiste du bon-heur on jette peu les yeux dans l'abyssme de l'infortune. La prosperité nous enchante & nous aveugle, ou du moins cet objet nous semble si beau & si charmant, que difficilement en destachons nous nos regards pour en contempler qui soient laids. Quand mesme en

l'estat

Vne cause  
superieure  
domine  
à tous nos  
malheurs.

Si le Parlement  
n'eust  
esté tres-gé-  
neroux, son  
bon-heur  
eust em-  
pêché qu'il  
n'eust confi-  
dé notre  
misere.

Ceux qui  
sont à leur  
aise n'ont  
guere de soin  
de ceux qui  
sont misera-  
bles.

Ou tout au  
plus cen'est  
qu'une com-  
passion inu-  
tile & sans  
action.



l'estat heureux de ces grands hommes il s'en seroit trouué beaucoup d'autres pour considerer nos douleurs; quand même quelquetendresse de cœur, quelque mouuement charitable les auroit portez à la compassion de nos maux; ce n'auroit tousiours esté qu'une compassion paresseuse & inutile, qu'un mouuement du dedans sans effet ny sans fruit au dehors; Et nous ne doutons pas qu'il n'y ait eu plusieurs ames affligées de la douleur publique dans leur felicité particuliere: Plusieurs esprits qui ont enuoyé leurs soupirs au Ciel contre la licence des Enfers: Mais il ne s'est point trouué d'assez grandes hardiesses pour cesser de plaindre ce Royaume, & en entreprendre la deffence. La crainte a tousiours combattu la pitié, & en a esté victorieuse: L'Imadu peril a tousiours effacé celle de la gloire; & c'est vne chose estrange & merueilleuse, que parmy tant de Heros qui ont combattu pour la France contre les Estrangers, il ne s'en soit trouué pas vn qui l'ait deliurée de son ennemy domestique.

Le Parlement seul meritoit cét honneur, comme il l'auoit entrepris, si le Ciel ne l'eust retardé. Il auoit sagement iugé dans son genereux dessein, que n'estant point arriué qu'aucun particulier eust fait cette vengeance publique, c'estoit à luy seul de la faire. Qu'il ne falloit pas qu'un criminel fust fougueusement executé. Qu'il estoit raisonnable que ses injustices fussent chastiees par la Iustice.

Le seul Parlement auoit entrepris ce que n'auoit osé tout le reste de l'Estat ensemble.

Nul particulier aussi n'auoit droit de le faire.



Qu'un particulier auroit pû faire son coup plustost par haine que par raison : Qu'il auroit plustost fait sa vengeance que celle de tout le Royaume : Qu'on auroit pû douter de la iustice d'un coup precipité : Qu'une execution mesme de cette nature auroit rendu criminel celuy qui l'auroit executée : Qu'il n'est pas permis à tout le monde de faire iustice, & que si cela estoit, on feroit moins mourir de coupables que d'innocens.

C'est à la  
seule Iustice  
à venger & à  
punir les par-  
ticuliers.

Ces raisons firent iuger au Parlement, que c'estoit à luy seul d'entreprendre vne vengeance publique, & non pas à l'attendre d'une resolution particuliere. Ils conclurent qu'à des excez solempnels il falloit vne punition solempnelle, & que comme toutel'Europe n'ignoroit pas les crimes du Cardinal, il estoit iuste qu'elle apprit la iuste & l'éclatante procedure de son supplice : Autrement il n'estimoit pas que Dieu peust trouuer sa mort agreable. Et de fait, c'estoit vn grand bon-heur pour nous que sa ruine ne nous fust pas vn crime, & que nous vissions sa punition sans la meriter. C'estoit ce que pouuoit faire le Parlement : Comme il a le droit de nostre peine, il a de mesme celuy de nostre vengeance. Dieu qui se l'est reseruée luy en a donné le pouuoir, l'ayant donné à nostre Prince, dont il a receu la balance & l'espée, pour poiser d'un costé, & trancher de l'autre. Il n'auoit donc entrepris rien que selon la puissance de sa charge;



sa belle & sa genereuse resolution estoit de son autorité & de son deuoir.

Et de fait, estant tuteur du Roy en son basaage, n'estoit-ce pas à luy à prendre sa place en sa Minorité? Et tenant sa place, n'estoit-il pas obligé aux mesmes fonctions auxquelles le Roy luy-mesme eust esté obligé: Or les Roys qui sont les Peres de leurs Peuples en doiuent estre aussi les defenseurs; tellement que le nostre ne pouuant encore nous defendre, le Parlement deuoit suppléer à sa ieune impuissance, & nous proteger.

C'est au defaut du Roy au Parlemēt à proteger son Peuple, quand ceux-la ne le font pas qui y sont primitiuelement obligez.

Je ne dy pas que ce ne fust primitiuelement le deuoir de la Reyne Regente, puis qu'elle auoit l'Empire dans sa main: Cēt Empire n'estoit pas moins d'auoir pitié de ses Sujets, que de leur commander; Il falloit donc qu'elle les defendist, au lieu de les abandonner. En ce rencontre les mauuais conseils d'un mauuais Ministre luy ont fait oublier son deuoir; Falloit-il que le pauvre Peuple perist sans secours, pource qu'elle ne pensoit pas à le secourir: Quand elle sera sortie de l'erreur qui l'a seduite, qu'elle aura vaincu le charme qui l'aueugle, & qu'elle sera retournée à sa bonté naturelle, elle cognoistra bien qu'elle deuoit benir ceux qu'elle a maudits, & peut-estre dirat'elle à ceux contre lesquels elle fulmine ses vengeance; Que ie suis malheureuse de vous auoir resisté! Et que ie serois heureuse si vous m'auiez vaincuë!

C'estoit premierement le deuoir de la Reyne Regente.



La Reyne n'a  
point esté  
offensée  
quand le  
Parlement a  
entrepris ce  
qu'elle de-  
uoit desia  
auoir fait.

Car enfin quoy que cette bonne & cette grande Reyne trompée puisse dire, l'offence qu'elle pretend luy auoir esté faite n'est qu'imaginaire, & n'a point du tout de realité. Le Parlement pour l'auoir choquée a tousiours trop sceu quelles deferences il luy deuoit rendre. Luy-mesme ayant confirmé sa Regence, & en ayant encore rendu le pouuoir plus ample, il n'a point dessein de le diminuer; mais il cognoissoit bien que ce qu'elle sembloit vouloir, ce n'estoit pas elle-mesme qui le vouloit, & que s'opposant à ses volonte, ce n'estoit pas à ses volonte qu'il s'opposoit. Les ardans mouuemens de la colere que le Cardinal luy inspire ne luy doiuent point estre imputez, ce sont des mouuemens estrangers. L'obeissance que le Parlement eust rendue à ses volonte n'eust point est glorieuse à sa personne; & c'eust este mal suiure son deuoir que de les escouter. La fidelité que tous vos Sujets vous deuoient & qu'ils vous doiuent encore, grande Reyne, leur defendoit de vous obeir. Souffrez nous de vous dire, sans vous offenser, qu'il est des malades ausquels il ne faut rien accorder de ce qu'ils demandent, puis que leur appetit ou leur raison dereiglée les obligent à rechercher plustost la mort que la santé. Vous auez esté contrainte, Madame, par les conseils empoisonnez d'un mauuais Ministre, de rechercher tout de mesme vostre ruine. Comme il vous gouerne vn peu trop absolu-  
lument



lument dans cette fatale autorité, qu'il a encore fatalement usurpée, il taschoit de vous vendre bien cher vostre propre bonté. Sa malice estoit à ce poinct, Madame, que dans le noir dessein qu'il auoit si audacieusement tramé contre vous, il vous employoit vous-mesme, & qu'il n'estimoit pas sa rage assez grande, ny vostre perte assez esclatante, si mesme en vous perdant il ne vous rendoit encore l'instrument de vostre malheur. Vous souhaitiez de l'estre, Madame, n'en doutez point. Vous vous efforciez d'obliger vn ingrat, qui pour recompense à toutes vos faueurs ne cherchoit qu'à vous voir perir.

Qu'estoit-ce autre chose, grande Reyne, que d'empescher la Paix si vniuersellement souhaitée? Qu'estoit-ce autre chose que d'arrester les heureux succez de vos armes trop victorieuses à sa fantaisie? Qu'estoit-ce autre chose, enfin, que de piller comme vn pirate & comme vn brigand toute la richesse de cét Estat, d'espuiser son plus pur sang comme vne sangsue, & de vouloir comme vn destructeur destruire la premiere Ville de ce grand Royaume. Quand vos Sujets seroient tous ruinez, que feriez vous? Si vos membres estoient brisez, où seroit vostre force? Alors vous seriez avec nous à la mercy de nos Ennemis, & vous n'aurez de reste en vostre infortune que le regret de n'auoir pas voulu la preuenir quand vous le pouuiez. Quel



compte ainsi pourriez-vous rendre ny a Dieu ny aux hommes de l'administration qui vous a esté commise? Quel Royaume remettriez vous à vostre fils apres auoir perdu le sien? Mere miserable, Illustre infortunée, quelles douleurs receuriez-vous de voir ce cher fils despoiüllé; Et encore par vostre indulgence.

Le Parlement fut  
généreux  
dans son des-  
sein, & agit  
plus qu'on  
ne peut dire

Le Parlement fut donc sage & courageux au delà de ce qu'on peut dire. Sa juste resolution fut vn effort de grandes ames. Tout est merueilleux d'vn si beau dessein. Les esclatantes vertus que tout à la fois il fit voir en ce fameux rencontre le doivent rendre admirable à tout l'Vniuers. Cette prudence avec laquelle il découurit les lasches pensées du Cardinal; Cette generosité avec laquelle il s'opposa à ses pernicioeux desseins; Cette fidelité adroite, vigoureuse & incorruptible qu'il tesmoigna pour son Prince; Cét amour actif, desinteressé & ardent dont il rendit de si belles preuues à sa Patrie: Tout cela sont autant de Heraux qui alloient crians par toute la terre, & chez tous les Peuples, Combien est heureuse la France d'auoir de si bons & de si glorieux deffenseurs de sa liberté! Et combien Dieu cherit LOVYS XIII. son illustre Monarque d'auoir en sa minorité de si bons tuteurs, & de si passionnez Sujets.

Le Parlement ne fut  
pas seul à ser-

Cette gloire toutesfois si bien meritée luy fut commune avec d'autres. Vn esclat si grand brilla



fur d'autres genereux ; & sa beauté fut si charmante & si souhaitable , qu'il fut impossible qu'il en jouyst tout seul. Il se trouua d'Illustres enuieux qui luy vindrent partager l'honneur de seruir le Prince & la Patrie , & qui ne voulurent pas demeurer stupides dans vne si belle occasion de faire leur deuoir. Mais cét honneur est d'vne nature si excellente , qu'il ne fut point amoindry , encore qu'il se partagea. Côme le Soleil distribuë sa lumiere avec vne si merueilleuse dispensation , que quelqu'un n'en reçoit pas plus pour estre tout seul , & que tous n'en reçoient pas moins pour estre plusieurs ; quand Messieurs les Generaux vindrent augmenter le nombre des defenseurs de la Patrie , l'esclat du Parlement n'en fut point diminué. Ils en deuidrent tous brillans sans qu'aucun perdist la moindre estincelle de sa lumiere. Au contraire mesme ce renfort de celebres Partisans rendant le party en quelque sorte plus iuste , le rendoit aussi en quelque sorte plus lumineux.

uir l'Estat  
les Generaux  
voulurent  
jouyr du  
mesme hon-  
neur.

Quoy que c'en soit , nos Senateurs & toute la France avec eux doit estre beaucoup obligée à ces ames Heroïques. Ce sont d'invincibles enfans qui n'ont point oublié l'amour de leur mere , & qui par d'excellentes & d'ardantes lumieres ont bien sçeu la cognoistre & la trouuer dans les ombres de deux differents partis qui prenoient son nom. Le Roy que traïsnoit ( si ie l'ose ainsi dire ) l'ennemy de ce



Ce n'est pas  
vne marque  
de puissance  
& d'autorité  
que de se  
cacher &  
fuir.

Royaume ne peut les esbloüir. Ils cognurent bien que l'autorité Royale n'estant encore en luy qu'en puissance, & non pas en vsage, on n'auoit pû l'enleuer avec luy. Que son depart nocturne en estoit vne raison, & vne preuue indubitable. Que ceux qui vsent de cette autorité ne fuyent point, & ne se dérobent iamais. Que c'estoit vne priuation & vn abandonnement manifeste de se souverain pouuoir que cette euasion timide & indecente dont les plus foibles mesmes deuroient rougir.

Ces genereux & ces sages Heros, considerans donc que le Roy mineur n'vsant point encore de sa puissance Souueraine; Et que cette puissance toutesfois pour le gouuernement de l'Estat ne pouuant estre en ses mains, & deuant estre en d'autres, ne pouuoit estre recognuë en celles-là, de ceux que la crainte & la fuite esloignoient infiniment d'une si haute independance, abandonnerent les lieux d'où ils iugerent qu'elle s'estoit esuanoüye, & vindrent chercher ceux-là où elle s'estoit acheminée. Comme les belles fleurs qui ne peuuent viure sans suiure d'un mouuement continuel l'astre donc elles reçoient la chaleur & la vie. Ainsi ils abandonnerent le Roy pour le seruir; Si l'on abandonne au moins ce dont on porte tousiours l'amour dedans le cœur, & l'image dedans la mémoire. Si l'on peut dire abandonner ceux-là dont on embrasse ardemment la querelle, & pour lesquels on donne



donne librement le repos , les biens & la vie.

Si ceux qui n'ont pû concevoir de si hardie & de si genereuse pensée faisoient vne iuste reflection sur le depart de nos Generaux , & sur leur indigne attachement , ils verroient quels d'eux tous ont demeuré plus proches du Roy ; & quelle difference il y a de l'auoir tousiours deuant les yeux , ou de le porter tousiours dedans l'ame. Ceux qui voyent les choses dans leur vray iour , iugent facilement quel aduantage nos Generaux ont remporté sur ceux qui pour la personne du Roy ont eu vn attachement opiniastre ; Et sans doute qu'un iour le Roy luy-mesme cognoistra qui d'eux tous l'a le mieux suiuy.

L'amour le plus pur & le plus sublime , n'est pas celuy-là qui nous donne pour la presence de la chose aimée vne ardeur aveugle , & vne passion ignorante. Il nous pousse plus loin , & nous esleue plus haut qu'à l'objet des yeux ; Il commande à l'esprit , & le faisant agir à sa façon accoustumée il nous donne des mouuemens plus spirituels. Ainsi de l'objet des sens il nous conduit à sa gloire , qui est l'objet de l'ame ; & pour celuy-cy quand il est besoin il nous fait abandonner celuy-là.

C'est cette passion qui arrachea nos Generaux d'aupres de la personne de nostre Monarque. Le soin de son salut , de son honneur & de la reputation de sa Monarchie, eust plus de pouuoir sur eux

C'est l'a-  
mour qu'ils  
ont pour luy  
qu'ils en a-  
esloignent.



que non pas sa presence. C'est cette sollicitude glorieuse qui leur fit abandonner la pompe & les delices de la Cour pour se venir plonger dans les fatigues de la guerre, & qui par vn desintéressement absolu leur fit preferer leur deuoir à vne fausse & à vne criminelle faueur.

Ils abandon-  
nerent leurs  
honneurs  
pour leur  
gloire.

Dans vn dessein si legitime rien ne peut les espouuanter. La perte de leurs dignitez ne leur fut pas considerable aupres de leur gloire. Les risques mesmes de la mort si facile à trouuer dans le hazard des armes ne peurent attiedir leurs courages. Eust-elle esté mille fois plus évidente & plus assurée, ces Fiers & ces nouveaux Decies se fussent toujours voüez au salut du Pays. La crainte n'entre point dans des ames que de si beaux mouuemens ont remplies, & la justice de la cause qu'ils embrassoient ne souffroit point de terreur en ces protecteurs.

Ainsi certes  
on eut tort  
de les soupçonner à  
leur attitude.

Qu'on cognoissoit mal la pureté de leurs pensées quand on soupçonna leur retour. Quelques vns s'imaginèrent alors qu'il falloit apprehender quelque surprise de ceux qui veritablemēt ne venoient que pour nostre secours. Ils ne trouuoient pas bon qu'ils retournassent, pource qu'ils s'en estoient allez. Ils disoient qu'il n'y auoit point entr'eux & nous d'attachemens plus forts que ceux qu'ils auoient ailleurs du sang & de la nature; & qu'enfin ceux qui n'auoient iamais abandonné la Cour, le



faisoient apparemment bien hors de saison pour n'estre pas soupçonnez.

Mais ce n'est pas chose fort nouvelle que la crainte trouue par tout des ombrages. Les animaux timides fremissent quand le vent se joüe de l'herbe dont ils se repaissent ; & il y a des esprits foibles qui s'imaginent voir tousiours des phantosmes qui les poursuient & qui les menacent.

La crainte apprehende tout mesme ce qu'il a deuoit rassurer.

Le Parlement en ce rencontre , fut plus clervoyant & plus asseuré. Il jugea que ces Messieurs s'en estoient allez, ou sans sçauoir le dessein de ceux qui emmenaient le Roy , ou du moins pour le rompre & le ramener. Il sçauoit bien qu'on ne peut ny suiure ny abandonner vn party sans le cognoistre. Qu'apres l'auoir mesme cognu il falloit du temps pour se resoudre. Il ne douta point que pour vne si haute resolution il ne fallust vn peu combattre contre soy-mesme. Que la Cour a beaucoup de charmes qu'il falloit vaincre. Que les interets sont encore plus forts, & que le sang & la nature peuuent encore violenter dauantage.

C'est en cét endroit que la resolution de ces Heros sortant du rang des vertus communes s'eleue au dessus mesme des extraordinaires. Les difficultez qui s'opposoient à leur genereux dessein en ont rendu l'accomplissement plein de surprise. Il leur à fallu quitter le Roy , la Cour , leurs Charges, & leurs propres parens pour venir chercher la bon-

La resolution des Generaux fut vn effet de vertu plus qu'extraordinaire.



ne cause. Il falloit que l'amour fust bien ardent & bien allumé qui leur a esté plus précieux que toutes ces choses. La dernière sur tout auoit pour eux des attachemens si forts que le mouuement qui les a rompus ne peut estre plein que d'une extrême violence. Quand il nous faut armer nos bras contre nostre sang, que nous sommes contraints de faire la guerre à nos propres freres; La nécessité certes est bien dure & bien rigoureuse; Et ie ne scaurois dire quels peuuent estre ceux pour lesquels nous leuons le bras contre de si doux & de si chers ennemis. Il falloit à n'en point mentir que la Patrie eust sur ces Conquerans genereux vn empire bien absolu, puis qu'en des commandemens si cruels ils se sont trouuez si tost prests d'obeir.

Il n'y doit  
auoir rien de  
cher comme  
le Pays.

Ils l'ont fait toutesfois. C'est ce qui vous a trompez, vous qui ne comprenez pas iusques où peut aller toute la force d'une grande ame, & qui peut-estre n'avez encore iamais pensé qu'il n'y a rien qui doiuue estre preferable au Pays. Quand il y va de son salut, il ne faut auoir rien de cher. Agamemnon pour l'apprendre à toute la Grece, & mesme à toute la terre, donna courageusement sa chere fille pour estre immolée; & pour l'amour des Grecs refusa d'écouter la nature. Dans cette illustre passion, Rome vit iadis le defenseur de sa liberté, son Horace ne pouuoir pardonner à sa sœur, & lauer dans son sang le crime de quelques paroles & de quel-

que



ques larmes qui pour la mort de son amant luy estoient eschappées contre la gloire & sa Patrie. Et veritablement si par la Loy de Dieu nous deuons nous aymer les vns les autres, & cherir les interests de chacun en particulier comme le nostre propre; que ne deuons-nous point faire pour la chose publique où se trouuent vnis les interests de tous? Ce nous seroit vne lascheté bien honteuse si les Payens que ce beau feu a si viuement bruslez avec les seules lumieres de la nature auoient esté plus auant dans la perfection que nous avec celles de la cognoissance du vray Dieu, & celles de ses Loix adorables qui nous conduisent.

Nos illustres Generaux, graces à ce grand Dieu, sceurent se garantir d'un si infame malheur. Cognoissans ce qu'ils deuoient à cet Estat, ils firent ce qu'ils peurent pour le luy rendre. Ils se vindrent ioindre au Parlement, Genereux à Genereux pour l'accomplissement d'un si grand ouurage. Il falloit des bras à ces nobles testes; ils apporterent les leurs: Ces bras triomphans & si redoutables aux ennemis de ce Royaume. Ils firent leur deuoir pour destruire le Catilina de cet Empire. Ils voulurent estre contre ce Conjurateur de nostre ruine des Cicerons & des Antoines, dont les vns descouuroient par leur prudence & par leur industrie les noirs desseins de sa malice, & les autres renuersoient à coups d'espées les orgueilleux attentats de sa criminelle puissance



Qui pouuoit douter de la ruine de ce perfide, puis que les Muses & Mars s'estoient vnis pour son supplice. Nous voyons d'un costé les sages, & de l'autre les vaillans : Nous apperceuions même par tout la science & la valeur dans nos protecteurs. Le Parlement auoit des Achilles, & nos Generaux des Vlysses dont la prudence & le courage ne pouuoit succomber. Nostre Rome ne manquoit ny d'espée, ny de boucliers, ny de marcel, ny de fabius pour le malheur de son Hannibal.

Le Parlement ny les Generaux ne sont pas blâmes du succez des affaires.

Que si l'effet n'a pas suivi de grandes apparences : Si nous auons demeuré sous le ioug que nous voulions secouer, faut-il en accuser ceux qui n'ont pas manqué de bons desseins ? Est-on obligé de réussir à tout ce que l'on entreprend ? Ne sçauons-nous pas que de tout temps les plus grands genies ont esprouvé de grands reuers ? Que les affaires vont bien souuent tout au rebours de ce que l'on pense ? Que tous ceux qui font leur deuoir n'accomplissent pas leurs projets.

Les hommes ne peuvent rien d'eux-mêmes.

Quoy ! vouloit-on que des hommes nécessairement vinssent à bout de leurs entreprises ? Les hommes regissent ils l'Vniuers ? Sont-ils au dessus des causes superieures ? Les Arrests du Ciel dépendent-ils de leur volonté ? Il faut donc considerer qu'il est vne puissance au dessus de toutes les autres, de laquelle il est dit, *Qu'elle dispose*, cependant que l'homme *Propose*. Nous faisons souuent des desseins qu'elle renuerse auant même qu'ils soient



formez. C'est elle qui nous retient dans les chaines que nous voulions rompre. Elle donne ce frein à l'impetuosit  de nos mouuemens. Elle nous laisse dans la seruitude, parce qu'elle cognoist que peut estre nous serions trop audacieux si nous estions libres. Elle veut que la pesanteur de nos fers qui tirent nos corps vers la terre, esleue nos esprits vers le Ciel. Elle veut que nous considerations, *qu'il n'est point de mal dans la Cit  que le Seigneur n'ait fait*, afin que cette cognoissance nous oblige   attendre plustost nostre liberation de sa grace que du secours des hommes, ny de celuy de nostre courage & de nostre industrie.

Il nous faut  
attendre nostre  
secours  
du Ciel.

F I N.



